

समे – 12:25

<><><><><><>

HM JK Criminal Laws

केन्द्री गृह मंत्री अमित शाह होर एल्लै जम्मू कश्मीर दे उपराज्यपाल मनोज सिन्हा ते मुख्यमंत्री उमर अब्दुल्ला हुंदी मजूदगी च केन्द्र शासत प्रदेश च नमें अपराधिक कनूनें दी अमलावरी दी स्थिति दी समीक्षा करा करदे न। इस बैठका च मुख्य तौरा पर ध्यान पुलस, जेलें, अदालतें, कनूनी कारवाइएं ते फोरेंसिक जांच सरबंधी बवस्थाएं दी मजूदा स्थिति पर केन्द्रित रौहग टकोहदा करियै नमें कनूनें दी पच्छोकडै च जिंदे च 2023 आली भारतीय न्याह संहिता बीएनएस 2023 आली भारतीय नागरिक सुरक्षा संहिता बीएनएसएस ते 2023 आली गै भारतीय साक्षय अधिनियम बीएसए शामिल न, जेह्दे पैहले आले आईपीसी, सीआरपीसी ते भारतीय साक्षय कनून दी थाहर लागू कीते गे न। ताजा जानकारी मूजब इस बैठक च केन्द्र ते जम्मू कश्मीर सरकारै दे बड्डे अधिकारी बी मजूद न।

<><><><><><>

LG-Partnership

उपराज्यपाल मनोज सिन्हा होरें जम्मू कश्मीर च नोजवानें दे सशक्तिकरण लेई सार्वजनिक ते निजी क्षेत्र दी भयाली दी भूमका पर जोर दित्ता ऐ जेह्दे ढांचागत सुविधाएं च सुधार आहन्नीयै नमें मौके उपलब्ध कराइयै ते बक्ख-बक्ख क्षेत्रें च नमिएं संभावनाएं दे रस्ते खोल्लियै योगदान देई सकदे न। उपराज्यपाल होरें एह गल्ल जम्मू च शुरू होई दी पैहली पैहली सिक्ख क्रिकेट प्रीमीयर लीग दा उद्घाटप करने मौके अपने संबोधनै च आखेआ। उपराज्यपाल होरें आखेआ जे जम्मू कश्मीर एल्लै समावेशी विकास लेई कम्म करा करदा ऐ जेह्दा मतलब एह होआ जे समाज दे सब्बने वर्गे दा पूरा पराता समाजी ते आर्थिक विकास। उनें आखेआउ जे इस चाल्ली दियां पैहलकदमियां समाज च बदलाव आहन्नने ते सब्बने वर्गे दे सामे ते पूरे पराते समाजी आर्थिक विकास च मती महत्वै आली भूमका नभाई सकदियां न। उनें आखेआ जे इंदे नै अनुसाशन, एकता ते सदभाव दे मुल्लें-कट्रें ते बचारें दा बी विस्तार होंदा ऐ।

<><><><><><>

Minister Motor Deptt.

ट्रांसपोर्ट मंत्री सतीश शर्मा होरें मोटर गड्डिएं सरबंधी मैहकमे दे कम्मकाज ते उपलब्धिएं दी समीक्षा कीती ते आखेआ जे गड्डी चलाने लेई ड्राइविंग लाइसेंस बनोआने आले गी तोले लाइसेंस उपलब्ध कराया जा, एह्दे लेई इक निगगर बवस्था ढांचा तैआर कीता जाना लोड़चदा। उनें सड़कें पर सुरक्षा गी जकीनी बनाने लेई दूर दरेड़े इलाकें च बी ड्राइविंग सिखलाई केन्द्र स्थापत करने, सड़कें पर जांच चैकिंग बधाने ते ट्रैफिक नियमें दी खलाफवर्जी करने आले खलाफ सख्त कारवाई करने पर बी जोर दित्ता तां जे सड़कें पर सब्बनें दी सुरक्षा गी जकीनी बनाया जाई सकै ते गड्डिएं दी बवस्था आले ढंगै सिर आओजाई बी जकीनी बनी सकै। मंत्री होरें लोकें तगर हर सुविधा ते सेवा, पूरी चाल्ली पारदर्शी ढंगै सिर पजाने दे सरकार दे धेड़्यै गी बी पक्का कीता।

<><><><><><>

CS-Sehat

मुख्य सचिव अटल डुल्लू होरें “सेहत ऐप” दी रस्मी तौरा पर शुरूआत कोला पैहले एह्दी तफसीली समीक्षा कीती ते आखेआ जे एह् मरीजें ते डाक्टरें बश्कार हर मुद्दे दा नबेड़ा घर बैठे दे मुमकिन बनाने च मददगार साबत होग, भाएं ओ बमारी बारे जांच, सलाह मशवरा, सेहत बीमा सेवा, जां सेहत सरबंधी जानकारी उपलब्ध कराना होए। बीआईएसएजी-एन आस्सेआ विकसित कीती गेदी इस ऐप राएं अस्पतालें, ब्लड बैंकें, दोआइए दे बजार दकानें दी जानकारी मौके पर थोई सकोग।

<><><><><><>

GoC Visit

फौज दी व्हाइट नाईट कोर दे जीओसी लैफ्टिनेंट जनरल नवीन सचदेवा होरें सुरक्षा बवस्थाएं दा जायजा लेने लेई रियासी ते राजौरी जिलें दा दौरा कीता। इस दरान उनें उत्थें तैनात सैनिकें दी इलाके च रमानदारी ते सुरक्षा जकीनी बनाई रखने लेई उंदी निष्ठा ते सतर्कता दी सराहना कीती। उनें समूलचे जम्मू संभाग च रमानदारी ते सुरक्षा सुनिश्चित करने लेई फौज दे निश्चे गी फही पक्का कीता।

<><><><><><>

DM Jammu

जिला मैजिस्ट्रेट सचिन कुमार वैश्य होरें इक आदेश जारी कीता ऐ जेहदे तैहत् लोकें दी सुरक्षा च इजाफे आस्तै पूरे जम्मू च मुख् मुख् थाहरें पर सीसीटीवी कैमरा लाने दी जरूरत दस्सी गई ऐ। भारतीय नागरिक सुरक्षा महिला बीएनएसएस 2023 दी धारा 163 तैहत् एह आदेख् बेंकें, एटीएम, शापिंग माल, अस्पताले, तालीमी इदारे ते दुए ऐसे थाहर जित्थें लोकें दी मती आओजाई रौहदी ऐ, पर लागू होंदा ऐ। इनें थाहरें कैमरे दो हफ्ते दे अंदर अंदर लोआने चाहिदे न। एह कैमरे अंदर जाने ते बाहर ओने आले रस्ते पर लगने चाहिदे। कैमरे दी फुटेज 30 दिनें तोड़ी सांभनी लोड़चदी ऐ ते जरूरत पौने पर कनून नाफिज करने आले धड़ें कन्नै सांझा कीती जापी लोड़चदी। इस आदेश दी पालमा नेइं करने पर कनूनी कारवाई कीती जाग।

<><><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” राहें इस बारी 23 फरवरी गी देश विदेश च रौह्ते आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 119मीं किश्त होग। कार्यक्रम च शामिल करने लेई लोक अपने बचार ते सुझाह 21 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौह्ग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग। मन की बात दा डोगरी अनुवाद उस्से रोज रातीं 8 बजे प्रसारत कीता जाग। आकाशवाणी दा क्षेत्रीय समाचार एकांश 23 फरवरी गी गै रातीं साढ़े 10 बजे मन की बात पर इक विशेष परिचर्चा बी प्रसारत करोग।

<><><><><><><>